

周
中
丞
疏
稿

中州疏稿目錄

卷之一

崇重道德節義疏

議留贖罰銀兩疏

優錄賢能官負疏

薦舉人材疏

薦舉方面官負疏

舉刺有司官負疏

卷之二

舉劾武職官貢疏

薦舉教職官貢疏

薦舉首領佐貳疏

薦舉王官疏

糾劾不職方面官貢疏

糾劾不職有司疏

卷之三

糾劾不職有司將領疏

更調縣令疏

代 題請乞推恩疏

代 題請乞 卹典疏

代 題懇乞 卹典疏

撫臣服闋疏

卷之四

旌表節烈疏

表揚貞節疏

言兵事疏

蠲恤中土災傷疏

參究宗人性惡故殺疏

卷之五

勘問怠玩指揮疏

衛官怠玩激衆疏

叅兇軍違限官負疏

中州疏稿卷之一

臨川周孔教明行父著

屬吏

祁永燦
陳以開

全校

崇重道德節義疏

為重名教以敦薄俗以崇

聖化事臣聞事有宜緩而急若輕而重者名教是也名教莫重於道德節義此二者國與天地所恃以立猶元氣之流行不容一日或息者也是故下車而封比干之墓過魯而崇宣尼

之祀豈不急是務所以砥礪人心而轉移世道也今

國家多事之秋人心澆薄之會崇德表忠尤為
亟務嗟夫宋人擯道德儒術詘於功利而宇
宙為腥五代擯節義賢人詘於武功而天地
為閉此世道治亂之大機也臣以菲才承乏
中州中州固道德節義之鄉也臣於攬轡之
暇不勝執鞭之思謹按故牒秦漢以來儒術
大壞道脉幾絕天生宋儒程顥程頤兄弟自

相師友明正學於伊洛之上其徒尹焞謝良
佐張澤李籲輩歛袂而往從之使六經之道
懸日月而炳日星此二程氏之為烈也其後
二百餘年有元儒許衡者雖生於濁亂之世
毅然以斯文為己任講明二程之學教訓生
後人稱之曰魯齋先生云以上諸儒皆學士
所謂有道仁人也臣近過其故里子孫式微
祠墓荒翳或祀或否即祀俎豆不備有司且
以簿書期會為大故矣甚可嘆也中州以節

義稱者自關龍逢比干以來代不乏人而其
著者在唐宋之季其在唐如張巡許遠之振
城抗賊而死顏真卿果卿之兄弟就義而死
在宋如岳飛之志復神州孤忠不白而死宗
澤之百戰殲虜壯志不酬而死此其彰彰較
著者他如馬遂之死貝州安濤之死鄭州謝
貺之死汝州張克戩之死汾州程迺之死不
興向子韶之死淮寧潘炎之死扶溝韓浩之
死維州杜炎之死輝傳察之死金史抗之死

代州康保裔之死高陽种朴之死河州忠孝
之死永興宋炎之死陝州此其忠憤義烈貫
日月而動天地乃大半無祠不免為若敖氏
之饑鬼即張許諸臣祠矣祠多傾圮空梁壞
壁巢燕雀而嗥狐狸臣近拜其祠下愀然者
久之為之低徊不能去也我

國家操此兩端為礪世磨俗之具中州人士之
以道德節義奮者斌斌稱盛臣於道德之臣
得二人焉節義之臣得八人焉蓋自元儒許

衡沒六百餘年有曹學正者學正名端澠池人弱冠博通五經雅慕伊洛之學儒者翕然宗之永樂初鄉舉授霍州正在霍十年其造士務踐履士服習其教如七十子之服孔子已而改蒲州其得士如霍州會端考績蒲霍諸士乃詣

闕爭留之所著有孝經述解四書詳說太極圖西銘通書解家規輯略存疑錄夜行燭儒宗統譜性理文集等編行於世論者以為

國朝理學之倡其後八十餘年有尤主事者主
事諱時熙洛陽人束髮即以聖賢自期居官
廉介有水磔聲已而掛冠闔門誦讀究心理
學開示來學四方之士負笈受業者如雲居
常與物無競言動有則鄉人化之稱為西川
先生所著有擬小學記有要語學者宗其教
題其所著書曰二明一脉蓋謂其學術直接
明道正脉云此二臣者皆中州之名儒臣採
之輿論咸謂宜從祀孔廟乃今鄉祠亦復闕

然此有司失於討論之故也節義之臣如鉞
鉉之殉節於革除許遠之捐軀於宸庶此其
大節凜然著人耳目臣不論論其軼者薛嵩
閔鄉人慷慨負志操洪武中累遷大理寺卿
永樂初以使

命護安南國王陳天平老嫗歸國行次芹站為賊
黎季犁所劫不屈死之季情靈寶人弘治中
舉進士授監察御史彈劾不避權貴逆瑾忌
之謫驛丞瑾誅復原官已而陞江西副使正

德八年會姚源洞賊叛情義憤激烈率兵討
之力戰而死時嘉善簿李錫饒州幕馬驄同
死于難義士猶多之此二臣者亦中州也王
冕洛陽人正德中舉進士授萬安令己卯宸
濠之變冕攘臂大呼舉義兵追剿至安慶逆
兵敗衄已而遷兵部主事守山海關甫五旬
而遼卒告變群醜嘯呼露刃階下侍吏拽冕
欲去冕正色拒之已而被執賊以刃脇之冕
不屈死之時植通許人以太學生為梁山縣

簿正德六年流賊藍四等率衆攻城植堅守
凡七晝夜會天雨雪城陷被執賊刃其面使
之跪已而又刃解其雙腕植憤罵不絕口賊
怒殺之其妻賈氏女三才亦不辱而死時遠
近聞之注嘆曰非獨植能其妻女亦烈丈夫
也以上數臣正氣義魄遠不慙張顏近可匹
鐵許乃不得沾半豆之祭使忠魂埃滅義骨
冰澌臣甚痛之方今干戈倥偬議兵議食臣
乃矢口談道德節義亦知迂濶不切事情孔

子曰兵食可去信不可去宋儒朱熹亦曰方
今憂不在兵食而在士習紀綱豈以其重若
彼其輕若此哉况今內之士習偷薄外之逆
節萌生姦雄睥睨義聲弗振宜弘獎道義之
風以敷流遜之教臣竊謂凡此道德節義諸
臣其已祀已旌者宜飾其祠宇或錄其子孫
其未祀未旌者宜闡其幽微補其闕畧或與
詔有司擬採中州古今以來道德節義分為
兩祠合祀于大梁庶四海九州咸仰

皇上重道勵節之意雖微必錄雖久必伸豈惟消
叛逆之心亦且為風俗之勸况中原者

國家腹心地四方之候以為治者也居常養成
道德忠義之俗異時緩急有所恃賴孟軻曰
教之孝悌忠信可使制挺以撻秦楚之堅甲
利兵使孟軻而愚人則可若孟軻而通達治
體可不亟採而行之哉若曰方今時誦未暇
及此臣前題餘贖千餘兩又近清查該司
未登循環無疑銀七伯餘兩此固不煩經度

而費已足用緣係表揚大典臣未敢擅便伏
乞

勅下該部查勘施行臣無任瞻仰之至為此理合
具本專差承差曹汝為親齎謹題請

旨

議留贖罰銀兩疏

為中州民窮可念議處贖罰餘銀以蘇積困
事臣竊見中州連年災傷之後元氣未復蠲
免振補帑藏空虛日朔方軍興又協濟銀八
萬兩今部議開銷止准二萬八千兩有奇其
餘方費處補漕運督臣陳于陞又有調兵防
倭之費矣據該道呈稱一切安家行糧俱無
措處夫舊者未補新者復來費將安出勢必
歛民夫中州之民即今僅存毛骨豈堪加派

批臣承乏兩河無所矧長唯一念省約與民
休息以故醵金稍有贏餘故事歲該解

進醵金四千兩今臣遵奉

明例除起解外臣仍積有自理贓罰銀七千兩又
委各官清查出各庫藏餘稅零星官銀三千
八百六十兩通共一萬八百六十兩臣聞今
都察院左都御史李世達先是任山東巡撫
時曾解餘醵金六千兩及餘稅二萬兩抵本
省民糧臣請得比例合無就將臣前項贓罰

等銀一萬八百六拾兩內除捌伯陸拾兩收
候臣題優禮道德節義諸費外其餘壹萬兩
或准抵補解過陝西不准開銷餉銀或准留
作防倭士卒行糧良便為此冒昧上

請伏乞

勅下該部再加查議將臣前項贓罰等銀壹萬兩
或抵補解過陝西銀數或留作防倭民兵行
糧庶寬一分民受一分之賜矣緣係中州民
窮可念議處贓罰餘銀以蘇積困事理臣等

未敢擅便為此理合具本專差承差曹汝為
親齋謹題請

言

優錄賢能官負疏

為乞

賜破格優錄賢能官負以風吏治事臣竊惟直指
使者攬轡一方以知人理枉為急臣承乏兩
河無所短長唯是辨官材理寃抑為兢兢其
地方賢不肖官負已詳臣舉刺疏中但此外
有中主獨行之吏多忌於獨醒罣誤枯朽之
吏勢難於再肉或去任而湮沒不稱或流落
而坎坷不遇臣心知其賢而不為表白是為

蔽賢心知其寃而不為昭雪不啻下石此文
仲所以致譏卞和所以掩泣也以故臣馬蕤
之所至留心詢訪得獨行之吏七人馬聖誤
之吏二人馬臣請為

皇上言之蓋自世道波折士習卑卑通者多而執
者少乃若原任河南管河副使李三才屯驛
鹽法僉事許守恩此所謂執者也濁者多而
清者少乃若原任汝寧府知府今丁憂丘度
此所謂清者也依違者多而廉潔者少乃若

浙川縣知縣王麟趾此所謂慷慨者也緣飾者多而悃悞者少乃若原任懷慶府同知今陞陝西臨洮府知府劉應聘見任確山縣知縣陳幼學此所謂悃悞者也正官自愛者多而卑官少乃若原任固始縣縣丞賈舜田今陞潁州州同此所謂自愛者也論罷當罪者多而罣誤者少乃若原任上蔡縣知縣曹世卿汲縣知縣李賦秀此所謂罣誤者也臣請詳言而無諱可乎臣竊見原任副使李三才

東心蹈義鐵心石腸先是不守河南公廉不
受私謁初故人有懷刺欲謁者既見趨趨躡
嚙刺終不敢出袖伊陽令張承恩與本官生
同里又鄉同舉也令以墨聞本官竟發覺之
毫不少徇已而陞河道副使條上防河事宜
甚悉一切負薪費檢發姦弊異時羨餘贖鍰
視之若膩恐浼也人合已者與之言所詣少
不會意徑還不留雖水禽決山鹿駭去之不
若也原任屯驛監法僉事許守恩澹然一心

獨立千仞請謁無所行貨贖無所用初
价藩有以私販觸禁者臣行本官按治據法不
少貸豪強屏息至於稽查傳符剔蠹清濫即
司道健兒行他縣多僦驟而行無敢犯者其
他平生孤介類如是臣不論論二臣中州事
較著者蓋如此所謂亢直不撓者二臣有焉
此二臣者正直不回之氣真足以激頽波而
濯流俗乃今一則戢翼故枝一則垂翅不振
臣甚惜之汝寧府丁憂知府丘度志懷霜雪

清貞寡欲汝寧故稱膏潤乃本官一切所出
視俸錢所入不求贏餘有冰檠聲至於居官
行政則又主寬和甚得吏民心稱之不容口
行之日老稚抱馬蹄涕泣有鄉宦孫价者年
八十有餘居常不下堂是自亦攜杖出送嘆
曰幸得須臾無死出餞清吏其得人如此古
稱清不近名貞不絕俗本官近之今且以憂
去矣似宜紀錄俟其服滿赴部優擢以勸廉
者浙川縣知縣王麟趾氣體高亮壘塊有正

骨先是居南臺時張膽言事大誼凜然至今
人猶高之乃竟以忤時左遷雖一邑如斗大
乎乃本官一意營職拊循其民若忘其為遷
謫者昔人謂大丈夫有蓋世之志而拘於下
位若立身矮屋中本官無乃似之似宜優擢
以風正氣可也原任懷慶府同知今陞陝西
臨洮府知府劉應聘為人彊力天性精於吏
事見事便宜當行者或夜不寢至旦尤不避
勞怨先是沁水暴溢齧隄老弱奔走乃本官

晝夜宿隄上竭力捍禦隄得不壞民賴以全
活甚衆臣頃巡歷獲嘉所過野無青艸村無
雞犬怪問之知民多逃者臣亟檄本官署縣
事本官出入阡陌開荒撫流殫盡心力已而
桑麻徧野民多復業闔縣百姓向臣保留其
實心任事蓋如此碓山縣知縣陳幼學力行
古道絕無緣飾性廉直門不受私謁專一拊
循其民割斷不避豪右民亦以此多附焉臣
近行其境即鄰邑之民仰之若父母願質成

者如赴口口青天臣詰問之皆曰陳青天不
受請託云不謂風會波靡之中有強毅執法
之士如此此二臣者真可以風矣似宜破格
錄用之固始縣陞任縣丞賈舜田官雖卑雅
負侏儻之奇節性廉潔口不言利居常布衣
糲食四壁蕭然僅携家僮一人自隨而已聽
斷不避豪強即邑中豪俠大姓不畏長吏而
畏邑丞良甚德之常繫一驢於庭人詰問之
答曰我以卑官而執法何異娘怒當車倘上

官不見信朝檄下吾暮策驢而東矣其大節
如是即尊官大吏所不如也今僅以州同陞
去人甚惜之原任上蔡縣知縣今為民曹世
為人負氣不能下人以故鄰邑害之竟以
署之石官行已實無玷闕臣近訪顏毛兼
詢憇樹家有去後之思人多不平之嘆即日
者百姓輕數千里躡蹻擔囊赴

闕上書為之鳴冤則民情大可覩矣原任汲縣知
縣今為民李賦秀其得民雖不如曹世卿之

深然操持潔白民至今猶憐之惟是與周知
府相訐迹近於薄然臣近如詢訪周知府實
有以激之矢在弦上不得不發耳非其意也
視他政發人陰私報怨賈名者殆有徑庭况
本官膂力過人騎射絕倫用之邊方必得一
矢之用大抵此二臣者性氣褊急觸時忤衆
誠亦有之降用亦足示懲矣削藉得無太甚
乎一經罣誤終身不白亦足悲也夫世尚通
錄一執者則通者執矣世多濁錄一清者則

濁者清矣世多依違錄一慷慨者則依違者
慷慨矣世多緣飾錄一悃悃者則緣飾者悃
悃矣卑官多自弃錄一卑官則窮途有騁足
之望矣罣誤多不白濯一罣誤者則燕益有
見天之日矣此固轉移吏治之一機也伏乞
勅下該部再加查訪如果臣言不謬宜擢用者擢
用宜紀錄者紀錄宜昭雪者昭雪其於吏治
民生不無小補矣

薦舉人材疏

為薦舉境內人材以備掄擢以資治理事臣
竊惟

聖人在上數澤豈有隱淪

明世憐才旁求勞于夢卜是以翔鳳弭翼佇利
見之期潛蛟聳鱗應來儀之感臣訪得原任
禮部尚書沈鯉履道彌高操絕俗薦歷宗
秩益篤忠貞有退食自公之風無私黨游說
之助方時貴暝目恣睢而心折其非屹屹抗

三門之柱及中涓委心結納而力辭其謁錚
錚持百鍊之鋼懸車以來闔門自守念存遜
遁演志箕山誠

社稷之元龜士林之冠冕原任南京太常寺卿
張鹵忠謨夙著亮節堅持掖垣抗疏千言振
慷慨之氣開府建牙兩地崇敦大之風棲遲
畝畝黃髮足備楷模表率鄉閭丹心久為磨
礪原任陝西巡撫右副都御史王旋鵠立不
群鷹揚獨運當甘肅瘡痍之後而厲兵秣馬

風清塞上之塵值全陝流徙之餘而撫衆發
倉雨潤溝中之瘠壯志堪策功於節鉞閑情
暫晦跡於菟裘原任貴州巡撫右僉都御史
郭庭梧初仕廉平飛雙鳧之舄再遷骨鯁高
獨勇之風聲震邊陲表伏波之銅柱義孚里
閭推文正之麥舟故州里歸其清流薦紳宗
其風景原任山西巡撫右副都御史侯于趙
溫文可掬持重不浮省垣敷歷十年河患民
瘼擘畫昭然掌上戟府綏懷三晉邊情虜勢

揣摩如在目中經綸國器攸歸仁孝鄉評允
協原任浙江左布政使加太僕寺卿張一霖
行惟崇雅性不趨時推最衡陽而荆楚思霑
口碑昭如白日不阿新鄭而華亭卻寢心地
皎若青天解綬歸來高難進易退之節闔門
養晦追廉頑起懦之風原任湖廣巡撫右副
都御史孫坤性行兼醇才誠兩合勞襄晉楚
屯田築障兩地著有風猷聲動華夷斬寇平
苗廿載懋宣石畫雄心尚堪世用雅操不愧

鄉評原任山東布政司叅政劉易從魁梧偉
貌侷儻長才自郡縣起家而扶弱鉏強所在
權豪斂手歷藩臬秉憲而揚清激濁一時貪
墨寒心方壯乞閑共羨急流之勇及時向用
必收未雨之功原任山西布政司叅政喬巖
忠耿性成深沉識定邑宰惠流境內三年上
最而閭巷傾心臺章直震

朝端五月左遷而縉紳扼腕膏骨階而歸卧
中僅數卷圖書及居里而養諸戶外惟一簾

風月今正當乎強任豈可棄于

清朝原任四川成都府知府梁策卓然高品藉甚
清名先為繕計兩曹而政釐夙弊及守蜀都
五月而民有去思孝兼愛日之誠違惜懸車
獨早才裕匡時之具豈容推轂猶遲以上諸
臣皆中州之名流幹國之利器所當及時起
用內如沈鯉尤物望具瞻人倫領袖堪居玉
鉉可副金甌乃草澤沉淪蒲輪不及臣誠恐

桑榆行盡龜玉終藏

王國之損永謝

聖世臣竊太息私用傷心伏乞

勅下吏部查果臣言不謬將沈鯉亟賜起用諸臣

隨材簡擢庶

國家獲休采之益而臣亦少寬蔽賢之咎矣緣
係薦舉境內人材以備掄擢以資治理事理
未敢擅便為此理合具本專差承差暫汝為
親齎謹題請

旨

薦舉方面官員疏

為循例薦舉方面官員事臣奉

命巡按河南先於萬曆十九年十月二十五日與
前按臣林文英交代行事間於萬曆二十年
九月內接見邸報欽蒙

聖恩改補直隸提督學校所有方面官員例應薦
舉臣訪得布政司分守汝南道右叅政李杜
通達老成精詳縝密清徭剔蠹三川之凋劫
為蘇察治辦官一路之綱維自整按察司按

察使鄒學柱神姿瑩徹才識高華辨官材則
見垣一方讞庶獄則持衡三尺公望推重憲
紀肅清管河道副使王恩民天質不雕風襟
可掬防河儼若防敵持身不啻持盈能淡世
情雅多古意大梁兵巡道副使陳禔才無施
不可治所至有聲千里塞帷政趾龔黃之美
一方建節風清梁宋之間屯驛益法道僉事
王孟煦心本光明節多特達激揚有體共高
廉問之風文學起家兼擅以事之美亦巡汝

南道僉事任應徵任事勵精受材膚敏脩武
備慮周包彛辨官邪明若指掌近清屯政裨
益尤多以上諸臣皆藩臬之良所當薦揚以
備擢用內陳禔今任維淺轉自本省例得併
薦該臣又查得故事司道官例有劾但大計
之後故者以有議而去新者多候代未來即
來者席未煖又去即河北一年之內缺道者
四即今尚缺二頃叅政耿定力陞任藩司幾
空持印四顧攝代乏人見在司道官僅僅八

人而已內二人又新任欲於六人之中吹毛
求疵竊恐播糠及米臣誠非庇過意在憐才
伏乞

勅下吏部再加查訪如果臣言不謬將李杜等循
資擢用庶賢哲彙升治理攸賴矣緣係循例
薦舉方面官負事理未敢擅便為此理合具
本專差承差曹汝為親齎謹題請

旨

舉劾有司官負疏

為循例舉劾有司官負事臣奉

命巡按河南先於萬曆十九年十月二十五日與
前巡按林文英交代行事間於萬曆二十年
九月內接見邸報欽蒙

聖恩改補直隸提督學校所有按屬有司官負例
應舉劾臣訪得開封府知府陳廉實政實心
有襟有度蒞衝郡而聲色不動御

价藩而調停得宜才本至誠器可遠到南陽府

知府李芳內精理而出之以寬平性溫恭而持之以正大列城仰鏡象指千里飲和革心彰德府知府何鯉受材膚敏任事勵精耘強植弱而寬猛得宜校士治兵而文武備具衛輝府知府王時濟躬先儉約有後葵之風政主寬和多斲雕之意力行古道亦擅文名彰德府同知帥機遠心遺俗雅志著書宏博而三筮盡知孤高而一塵不染衛輝府同知曹繼孝爽氣茂材達於從政治戎而檢梃姦弊

攝篆而膏沐瘡痍開封府同知胡喬岱資性
闡爽吏事精詳承委事事留心攝符處處歌
德開封府推官田立家潔已抱公一意營職
趨事疾若赴壑執法巖然斷山汝寧府推官
程紹捷若運斤而本之以誠明如懸鏡而行
之以恕藉甚萬口卓冠兩河南陽府推官李
光輝爽雅之性無待韋絙誠恕之孚不煩鉤
鉅洗煩苛之習流愷悌之聲河南府推官董
漢儒材諳雋明性資耿直投艱鉅確有擔當

遇矜疑無不昭雪彰德府推官吳鍾英知不
執方才無滯用理煩難有如振落摘姦伏不
啻發蒙歸德府推官宋師程風襟可親可掬
天質未琢未雕雅有君子學道之心絕無世
俗浮沉之態衛輝府推官童正蒙恂恂雅度
翼翼小心查盤所至稱平謙獄得情勿喜汝
州知州方應選爽氣絕倫雋才邁往學古從
政已著循聲榻管登壇堪司文鑰磁州知州
劉安仁念念為民事事從省休養之懷釀于

供億拊字之意勞于催科南陽縣知縣陳大
道治邑五年歌誦一口人既服其明允又稱
其廉平驗之行事俱有實政安陽縣知縣李
應策永凋疲之後竭拊摩之心念念愛民事
事釐弊不遺餘力真是循良新蔡縣知縣甕
幼金草鞠訟稀百里瘡痍立洗棠陰政茂四
封歌誦翕然函牛烹鷄不盡其用祥符縣知
縣張崇禮共推高明可理繁劇當衝應卒不
啻錯節盤根自簡調繁有若駕輕就熟鄢陵

縣知縣何爾健吏事精明器姿倜儻推強抑
梗不遺餘力積穀開荒真是苦心臨潁縣知
縣高第綺年英氣素履清襟邑小不盡其才
令簡人安其政唐縣知縣尹從教志不挫於
一蹶譽已滿於四封盤錯之才循良之政陳
留縣知縣江中信廉謹自將精勤不懈撫字
常多孳孳意催科不奉急急符嵩縣知縣汪
以時天資耿介吏事詳明興水利而舉鍾為
雲驅曠徒而解刀佩擯儀封縣知縣孫文龍

節愛備至徭役尤清民多簡便而樂輸吏無
畜緣以巧法光山縣知縣汪先岍勤恪自將
公正不撓良善為之吐氣豪強莫不潛踪河
內縣知縣侯加采惜民命一蕪不以妄施省
民財一毫不敢妄用廉平之譽遠近翕然洛
陽縣知縣錢夢臯氣度和平幹才嚴整吏弊
加意滌濯民徭設法調停汲縣知縣王有道
心本誠篤政多拊循念民情莫不欲安故治
道去其太甚商丘縣知縣姚鉉器度開爽政

術疏通能于整辦之中不失樹循之實羅山
縣知縣張敬講鄉約行保甲絕無虛文豐積
貯撫流移皆有實政鎮平縣知縣孫鶴年吏
事精明風力極敏鉏強而拾黨斂手拊瘠而
四境歸心靈寶縣知縣楊堪清欺隱法行豪
強撫流移恩到羸弱實心任事政譽翕然修
武縣知縣邵烟開荒竭盡心力剔蠹不避姦
豪疲邑正宜勞民得息以上諸臣皆有司之
良所當薦揚以備擢用行取之選者也內張

崇禮李應萊王有道令任雖淺係本省調繁
方應選江中信雖經陞任尚在地地方與張崇
禮等俱例應併薦其不職者除榮澤縣知縣
程學庸見今勘問候問另行招叅外又訪
得封丘縣知縣遲可化酒腸寬似海貪心深
似谿每飲輒醉每醉輒淫刑或五十板或六
十板犯人李雷等怨聲每詞必供每供必問
罪或稍有力或有力犯人張材等刺骨衙役
查點是矣每一名不到或罰香油五斤或十

斤皂隸汪尚賢等彈指挪榆斗斛印烙是矣
每斗一隻或罰穀五石或罰穀十石行戶張
安田等腐心怨恨錢糧自有正額而每兩加
二徵收不常公一私十馬戶奔走良苦乃每
石加三扣除或謂馬瘦官肥應

朝而擅動庫銀三百兩作何支銷臨行而濫受
監生王艾五十金是何法體官歲已壞物議
沸騰沔池縣知縣今陞直隸永平府通判曹
相性耽翹彙三日不飲便覺形神不親事多

糊塗一切聽斷全憑左右指使王守陽猾吏也知其所欲在酒輒以酒中之解頤相接安俊秀美臣也知其醉日常多輒乘其醉而憑之委心不疑治獄五年詞內未沾點墨悉衙內馬主文高下其手絕無關防沉酣終日民不得聞半語悉腹心安門子抑揚其詞大開鴈局准狀全無定期每日數詞每事數罪原告與被告同科犯人張清等切齒微解絕無定則每加二而入扣一而出納戶與解戶均

病里老張寅等吞聲言利析於秋毫民壯銀
有扣馬戶銀有扣即里書方東等一槩不遺
應

朝大肆需索蠹城驛借館夫銀義昌驛亦借館
夫銀即富戶李穩等一切波及故方其在任
有明打劫之謠及其去後有暗脫網之掃葉
縣知縣今陞山東膠州知州高文登實有豕
心徇于貨賄濫准狀詞而悉批鄉約都郵騷
然肆行科罰而不遺老人貪聲藉甚錢糧奉

派而後徵舊例也乃十九年而預徵二十年
之條銀得無太蚤乎度已不免蚤一日蚤得
一日之羨餘饑民志在得穀實惠也乃一切
以錢代之是何心乎知穀粟重滯唯折錢以
其半予民可以其半入已槩縣錢糧徵收每
兩加二納戶劉以謙等之告發得實十七年
蠲免糧銀侵入已庫吏徐孔元之經手可
查李舟等無辜良民也乃誣榜為盜非該道
之平反幾為獄中之怨鬼趙希顏等已遣軍

徒也乃竟不收監縱其窩訪不當出押之虛
狼魏龍岡擅押紅票至犯法矣罰穀百石竟
從輕釋王愛民淵藪強盜至害民矣通賄五
十金乃曲為包容其他毆行熊秀亭等之被
累也保安強求二驛之科折也汝洛河船價
之侵扣也瑣屑穢鄙類如是可謂官箴大壞
民怨已叢以上三臣通應照例罷斥以警官
邪者也湯陰縣知縣余應召性若鷲鳥貪甚
饑鷹事不求其便利乃任意絲更又不求其

近民輒深刑以逞內倚膽吏劉自淇為之腹
心肘足交而勝負立判外倚巨猾劉繪為之
牙爪耳目徧而閭巷騷然本縣條鞭銀每兩
加二徵收大戶李大猷面執有據宜溝驛館
夫銀大半扣除入已收頭劉棟等虛領可憑
會銀透支過多每百兩止筭三十兩管支韓
永科含淚補賠審編責放富戶五十家每家
餽銀十兩門子王化行黃夜過送土官李生
陽侵欺不問或謂錢幣通神富民李公廕援

鬚鬢面却以逢迎失意至於催徵逮繫老幼
囹圄喧填迎春押裝倡優耳目駭異此一臣
者法當罷斥但念居官未久才堪鞭策或姑
從降用以示懲創者也夏邑縣知縣黃磁平
易近良民頗德之但氣體羸弱不耐煩勞近
以積勞成疾不視事者三月有餘臣頃巡歷
其地據本官呈乞休致臣已批布政司查議
聞已而又據該縣百姓李習書劉務本等連
名保留情詞懇切臣欲從百姓之請則縣事

至煩似難料理欲從本官之請則居官謹慎
又難終棄所當照不及例改教以示曲全者
也河南府知府徐學禮性雖亢直事多乖張
初臣入境見其事有執持絕不浮沉心頗器
之無何大計有物色之者臣力為洗濯不虞
日久情異物議漸騰或謂其窺知府大門為
前朝寶藏因而拆毀改造得金寶無筭者或
謂史鄉宦被逮進千金為壽求免重罪者或
謂陝州尹知州沔池曹知縣知大計不免亦

各進二百餘金求援者或謂犯人金廷執史
偏山各以事犯亦各進百餘金求免罪者其
他開瑣碎類如是臣聞之不勝駭異已而徐
察之事屬影響多非情實似難毛求唯是太
守塞帷千里唯寬和能得吏民之心乃本官
束之以急唯節愛能甦凋疲之氣乃本官持
之以苛即如大門之更也鐘鼓樓之改修也
是亦不可已矣乎乃從鄉市夫千餘名力作
之農工奪于土木疾苦之怨聲雜於斧斤其

勞已甚民不堪也古有拔葵者尚不忍與民
爭利乃開清軍廳隙地為圃亦役火夫三百
餘名治之甚有婦女應役者一夫灌園一家
菜色其細已甚民不堪也旬一准狀狀不下
百十餘張下州縣半之無不取供者科罪入
于毫芒追比急于星火其婪已甚民不堪也
各州縣解到銀兩秤頭偏重羨餘盈溢雖是
故套不能禁革解戶疲于路矣賈有貨賄我
不與知無敢勻奪乃粗而米塩細而段絹之

數多以半價商賈誇于市矣我以不賄令列
城列城象之猶恐不既况生子有賀應

朝有贖即歲時伏臘進醪不絕州縣腹誅于下
矣以上數者雖中人所時有實吏議所大禁
况太守為百吏之長有一于此又何則焉唯
是本官性無妍阿才多揮霍量從議處尚堪
補過鄧州知州徐詔神昏形瘁性暴刑煩急
于民而寬于群小權落董門子之手明於用
刑而闇于聽斷依時猾吏之言里就禱太

和而履常滿于其境乘馬之餽遺無虛日與
皂查馬稅而肩常側于其市行戶之嗟怨不
絕聲程子遜一州豪惡也強姦薛明妻告發
乃罰銀四十兩竟從輕發落李士儒有名素
封也歐死張世祿被逮乃罰銀八十兩竟立
案不行徐五兒賭博亦輕犯耳乃責發監三
月不取致令本犯服毒而死湯朴索騾價亦
細故耳乃怒其犯已重責四十板而死其他
陂堰七十二處地課之侵也八關廂油稅之

區也應

朝富戶張英等暮夜之入也似屬影響有難深
求大抵本官才甚昏庸煩劇不宜況鄧州扼
梁楚之衝姦宄窟穴彈壓甚難臣今歲巡歷
其地即本境地方豪俠結黨橫行州里甚至
富者不能保其財弱者不能有其妻臣雖痛
加芟夷勢不能盡也乃以本官闡茸無為者
當之何異朽索之馭奔馬哉臣切為此等地
方須得一廉幹甲科提衡其間庶豪強有所

禁禦而閭里之凋疲可起矣郟城縣知縣丁日近心腸近實吏才甚庸聽斷滿口燕語全憑左右譯傳致積書葛卷心等乘間作弊行事一味狐疑悉聽吏書願指致腹吏權佑等抵隙招權懸鑼以倣重收者法至良也積棍郭光等惡其害已已而化為烏有竟置之不問立限以介緩急寬民力也猾吏馬學書等一槩混勾任意恣其狼貪竟冥然不知既設監矣復立空房三間間間常滿既鞭朴矣復

酷刑拶指指指欲斲汪相公市之於內暮夜
入而不得關防權佑等市之于外賄賂行而
不能鈐束最病民者才一籌不展獄經旬不
決朝帶進而暮發出重收監而輕收舖逮繫
之民如蟻囹圄之內如市公門出入如無人
之境男子苦刑拘囚婦人辱於輿隸刑政放
紛元元愁歎此一臣者投閑處僻或可支吾
當衝理煩無惑委頓以上三臣所當量調簡
僻以全器使者也伏乞

勅下吏部再加查訪如果臣言不謬將陳廉等循
資擢用行取遲可化等分別議處庶有司咸
知勸懲而于吏治民生不無小補矣緣係循
例舉劾有司官負事理未敢擅便為此理合
具本專差叅差曹汝為親齎謹題請

旨